

A nova agrupación de cooperación transfronteiriza ‘Río Miño’ recibe a súa autorización definitiva

A nova Agrupación Europea de Cooperación Territorial (AECT) Río Minho, que reúne á Deputación de Pontevedra e aos 16 concellos do Baixo Miño e Condado-Paradanta xunto coa CIM Alto Minho e dez câmaras do Norte de Portugal, acaba de obter a autorización que faltaba para o seu nacemento oficial. Este novo organismo servirá de ferramenta para a cohesión económica, social e territorial do contorno do Río Miño e, de xeito particular, para solicitar fondos europeos para proxectos conxuntos.

O grupo de traballo da AECT reúnese para supervisar a marcha de todos os proxectos do Miño transfronteirizo

O grupo de traballo da Agrupación de Cooperación Territorial Río Miño (AECT) reuniuse este mércores na sede da CIM Alto Minho e futura sede da AECT en Valençá para supervisar os proxectos que se están levando a cabo ao acubillo do Miño transfronteirizo e ter unha visión global da situación na que se atopan cada un destes proxectos, tanto o Smart Minho como o Visit Miño, ambos os dous promovidos pola Deputación de

Pontevedra en colaboración coa Comunidade Intermunicipal do Alto Minho.

A reunión entre Melgaço e Arbo pon fin á primeira rolda de xuntanzas do Smart Minho

A primeira rolda de xuntanzas de traballo entre municipios fronteirizos para abordar o proxecto Smart Minho dun xeito integral chega ao seu fin. E faíno coa participación do presidente da cámara municipal de Melgaço, Manoel Batista Calçada, e o alcalde de Arbo, Horacio Gil, nunha xuntanza con representantes dos promotores da iniciativa, a Deputación de Pontevedra e a CIM Alto Minho.

A principios de decembro comezaban as primeiras reunións de traballo da Estratexia do Río Miño Transfronteirizo, cinco xuntanzas entre o equipo técnico redactor e os alcaldes dos distintos municipios galegos e portugueses integrantes do proxecto para discutir os aspectos máis sobranceiros da cooperación entre vilas limítrofes e as estratexias conxuntas que deben artellarse co fin de que a cooperación se converta nun motor de desenvolvemento do territorio do Miño fronteirizo.

Arranca a elaboración da Estratexia de Cooperación Intelixente para o Río Miño Transfronteirizo

A elaboración da Estratexia de Cooperación Intelixente para o Río Miño Transfronteirizo está xa en marcha. Este xoves finalizarán as primeiras xuntanzas de traballo entre a equipa técnica redactora e os alcaldes dos concellos galegos e portugueses do Miño que participan no programa europeo e, ademais, xa está previsto que no primeiro trimestre de 2018 se celebre o Primeiro Foro Transfronteirizo con científicos das seis universidades da Eurorrexión para presentar unha análise-diagnose sobre as necesidades e potencialidades do territorio.

A Guarda, O Rosal e Caminha reúnense para mellorar a eficiencia da cooperación transfronteiriza

Cuarta xuntanza de traballo entre concellos limítrofes para afondar na cooperación transfronteiriza e sentar as bases da Estratexia de Cooperación Intelixente do Río Miño-Smart Minho. Representantes dos promotores do proxecto, Deputación de Pontevedra e CIM Alto Minho, reuníronse cos alcaldes de A Guarda, Antonio Lomba; do Rosal, Jesús María Fernández Portela; e de Caminha, Miguel Alves, para presentarlles a

Estratexia do Minho Transfronteirizo e discutir as vantaxes da cooperación entre vilas limítrofes de países distintos.

O Smart Minho reúne a Monçao, Salvaterra e As Neves para traballar en cooperación

Continúan as xuntanzas de traballo nesta primeira rolda de contactos entre concellos limítrofes transfronteirizos. Nesta ocasión, o presidente da cámara municipal de Monçao, António José Fernandes Barbosa, e os alcaldes de Salvaterra de Miño e As Neves, Arturo Grandal e Xosé Manuel Rodríguez, reuníronse con representantes da Deputación de Pontevedra e do CIM Alto Minho e co equipo técnico da Estratexia de Cooperación Intelixente do Río Miño para seguir buscando aqueles aspectos máis destacados de cooperación transfronteiriza, aspectos que estas vilas levan desenvolvendo dende hai anos.

Valença e Tui reúnen-se para revisar os aspectos máis sobranceiros da cooperación

entre as dúas beiras do Miño

Segunda xuntanza entre municipios transfronteirizos limítrofes para seguir traballando nas bases da Estratexia de Cooperación Intelixente do Río Miño Transfronteirizo-Smart Minho. O presidente da cámara de Valença, Jorque Salgueiro Mendes, e o alcalde de Tui, Carlos Vázquez Padín, reuníronse na vila portuguesa con representantes do equipo redactor do proxecto e das entidades promotoras, Deputación de Pontevedra e CIM Alto Minho.

Vila Nova de Cerveira e Tomiño, primeiros concellos en coñecer os detalles do proxecto Smart Minho

Arranca a rolda de reunións para presentar a Estratexia de Cooperación Intelixente do Río Miño Transfronteirizo-Smart Minho aos concellos implicados. Representantes da Deputación de Pontevedra e da Comunidade Intermunicipal do Alto Minho (CIM Alto Minho) reuníronse esta tarde coa alcaldesa de Tomiño, Sandra González, e co presidente da cámara municipal de Vila Nova de Cerveira, Fernando Nogueira, na que é a primeira xuntanza técnica de traballo para discutir os aspectos máis sobranceiros da cooperación entre vilas limítrofes e as estratexias conxuntas que deben de artellarse para que a cooperación se converta nun motor de desenvolvemento do territorio.

Pistoletazo de saída para executar os proxectos financiados con fondos europeos no territorio do Miño

Os proxectos Smart Miño, que pretende crear un instrumento de cooperación estable para os concellos da fronteira da provincia de Pontevedra e o norte de Portugal, e Visit Río Miño para potenciar o turismo no territorio transfronteirizo do Miño, veñen de recibir o seu “pistoletazo de saída”. A Deputación de Pontevedra xa aceptou oficialmente en pleno a subvención de tres millóns de euros para as dúas iniciativas, que están cofinanciadas polos fondos europeos do FEDER (ao 75%) dentro da primeira convocatoria de axudas do Programa de Cooperación Transfronteiriza España-Portugal (POCTEP) 2014-2020 INTERREG VA.

Preto de 3 millóns de euros para o territorio transfronteirizo do Miño

O territorio transfronteirizo do Miño beneficiarase dun investimento de preto de 3 millóns de euros grazas á concesión

dos fondos europeos do programa Interreg VA-POCTEP anunciada hoxe. O deputado de Cooperación Transfronteiriza Uxío Benítez cualificou de histórica a aprobación dos proxectos presentados pola Deputación de Pontevedra e a CIM Alto Minho e subliñou que a contía dos fondos aprobados “é a máis alta destinada desde a UE a un proxecto común e global para a mellora e desenvolvemento da fronteira do Miño” desde a construción das diferentes pontes entre o sur de Pontevedra e o norte de Portugal.

Converter a AECT Río Miño nunha ferramenta de desenvolvemento, obxectivo da xornada internacional sobre Cooperación Transfronteiriza

A Deputación de Pontevedra reúne durante o día de hoxe en Tomiño aos máximos especialistas en Cooperación Transfronteiriza de toda Europa. A xornada, denominada ‘A nova AECT Río Miño dende unha visión comparada: a raia e Europa’, contou na sesión de apertura coa presenza da presidenta da Deputación, Carmela Silva, do deputado provincial de Cooperación Transfronteiriza, Uxío Benítez, do secretario territorial da Xunta, Ramón Pereiro, do director da Fundación Centro de Estudos Eurorrexionais Galiza-Norte de Portugal, Rubén C. Lois, do presidente da Cámara de Vilanova da Cerveira e representante do CIM Alto Minho, Joao Fernando Brito Nogueira, e a alcaldesa de Tomiño, Sandra González. Nas intervencións de apertura, tanto a presidenta da Deputación

como o representante do CIM e a alcaldesa de Tomiño coincidiron nunha reivindicación unánime, ao insistir en reclamar que “os fondos europeos destinados a cooperación transfronteiriza sexan destinados realmente á fronteira”.